

## Evening Dogri (NSD) Bulletin 30-11-2025

### आकाशवाणी

1. प्रधानमंत्री नरेंद्र मोदी होरें पुलसै गी लेइयै आम लोकें दी सोच ते टकोहदा करियै नौजोआनें दी धारणा च बदलाव आहनने दी जरूरतै पर जोर दित्ता ऐ, उनें पुलस महानिदेशकें ते महानिरीक्षकें दे 60में सम्मेलन गी संबोधत कीता।
2. मोदी होरें अजज 'मन की बात' कार्यक्रम च मजूदा समें च भारत दिएं कई उपलब्धिएं ते विशेषताएं गी उजागर कीता।
3. कल शुरू होआ'रदे संसद दे स्याले आहले इजलास कोला पैहले अज्ज सरकारै सीनें दलें दी इक बैठक सद्दी।
4. दिल्ली पुलसै दे विशेष सीगे नै पाकिस्तान समर्थत इक आतंकी गिरोह दा भंडाफोड़ कीता ऐ।
5. भारत दी गायत्री गोपीचंद ते त्रिशा जॉली दी जोड़ी नै सैयद मोदी अंतरराष्ट्री बैडमिंटन टूर्नामेंट दे महिला डबल्स दा खताब जिती लैता ऐ।
6. ते क्रिकेट च भारत दक्खन अफ्रीका श्रृंखला दे पैहले इक रोजा मैच च भारत नै महमान टीम दे सामने 350 रनें दा लक्ष्य रक्खेआ ऐ।

<><><><><><>

### PM-DGP Conf.

प्रधानमंत्री नरेंद्र मोदी होरें पुलसै गी लेइयै लोकें दी सोच टकोहदा करियै नौजवानें दी धारणा च तुरत बदलाव आहनने दी जरूरतै पर जोर दिंदे होई आखेआ जे एहू बदलाव पुलसै दे पेशेवराना, संवेदनशीलता ते जिम्मेदारी दे प्रदर्शन कन्नै आई सकदा ऐ। अज्ज रायपुर च पुलस महानिदेशकें ते

पुलस महानिरीक्षकें दे 60में सम्मेलन दी अध्यक्षता करदे होई मोदी होरें राज्यें ते केंद्र शासित प्रदेशें दे पुलस विभागें गी निर्देश दित्ता जे बंदश लग्गे दे संगठनें दी नियमित तौरा पर निगरानी लेई इक तंत्र स्थापित कीता जा ते वामपंथी उग्रवाद कोला मुक्त इलाके दा पूरा पराता विकास यकीनी बनाने लेई तटीय सुरक्षा गी निगगर बनाया जा। उनें नशीले पदार्थें दे गलत इस्तेमाल आहली चुनौती कन्नै निब्वडने लेई इक समग्र सरकारी नजरिए दी बी लोड दस्सी।



## PM-Mann Ki Baat

प्रधानमंत्री नरेंद्र मोदी होरें आखेआ ऐ कि हाल दे कई घटनाक्रम भारत दी नमी सोच, नवाचार ते युवा शक्ति गी दर्शादे ना। अज्ज आकाशवाणी पर 'मन की बात' कार्यक्रम च मोदी होरें आखेआ जे हैदराबाद च दुनिया दी सभनें शा बड्डी लीप इंजन एम.आरे.ओ सुविधा दा उद्घाटन होए या आई.एन.एस माहे दा भारती नौसेना च शामिल होना या फ्ही मुल्लवै च स्काई रूट दे इंफिनिटी परिसर दी शुरूआत, एह सब्बै इस गल्लै दे परमाण ना। प्रधानमंत्री होरें आखेआ कि भारत नै 35 करोड़ 7 लख टन अनाज दी पैदावार दे कन्नै इक ऐतिहासिक रिकार्ड कायम कीता ऐ जेहड़ा राईबाई दे क्षेत्र च भारत दी इक बड्डी उपलब्धि ऐ। मोदी होरें आखेआ कि भारत दा अनाज दा उत्पादन पिछले 10 बरें च 10 करोड़ टन बधेया ऐ। उनें गलाया कि राष्ट्रमंडल खेड्डें दी मेजबानी मिलना भारत लेई इक मानै आहली गल्ल ऐ। उनें आखेआ कि एहू देश ते देशवासिएं दियां उपलब्धियां ना। मोदी होरें आखेआ जे एहू म्हीना केई प्रेरणां लेइयै आया ऐ। 26 नवंबर गी संविधान दिवस पर संसद दे केंद्री कक्ष च विशेष कार्यक्रम दे आयोजन दा उनें जिक्र कीता। उनें आखेआ जे वंदे मातरम दी डेढ सौमी बरे गंड दी शुरूआत देशव्यापी कार्यक्रमें कन्नै होई ते इस म्हीने दी 25 तरीक गी अयोध्या च राम मंदर च धर्म ध्वजा फहराई गेई ते उसै रोज कुरूक्षेत्र दे ज्योतिसर च पांचजन्य स्मारक दा उद्घाटन कीता गेआ। 2 दिसंबर गी काशी दे नमो घाट पर शुरू होने आहले चौथे काशी तमिल संगम दा जिक्र करदे होई प्रधानमंत्री होरें आखेआ जे इस बरे दे काशी तमिल संगम दा विशे बडा दिलचस्प ऐ। तमिल सिक्खो तमिल कराकलमा। उनें गलाया जे काशी दे लोक तमिल दा पूरे उत्साह कन्नै सुआगत करने दी तांहग रखदे ना। प्रधानमंत्री होरें

आखेआ जे शक्ति ते दया दी भावना भारत दी महान संस्कृति दा विरसा रेआ ऐ। उनें आखेआ जे दुए विश्व युद्ध दरान जिसलै हर पाससै विनाश, तबाही ते डर दा माहौल हा, गुजरात दे नवानगर दे जाम साहब महाराजा दिग्विजय सिंह होरें ज्हारें बच्चें गी आसरमा देइयै स्थारा दित्ता हा ते उनेंगी नया जीवन दान दित्ता। उनें अगगे आखेआ जे हाल च गै दक्खनी इजराइल दे मोशाव नेवातिम च जाम साहब दी मूर्ति दा लाया जाना भारत लेई इक मानै आहली गल्ल ऐ। “मन की बात” कार्यक्रम च जम्मू-कश्मीर दे अनौखे रामबन सुलाई मखीरै गी उजागर कीता। जंगली फुल्लें थमां उत्पादत इस खास मखीरै गी किश बरें पैहले गै जी.आई टैग हासल होआ ऐ ते बल्लें-बल्लें इसी पूरे देश च पंछान हासल होआ करदी ऐ। प्रधानमंत्री होरें आखेआ जे भारत अज्ज मखीर उत्पादन दे क्षेत्र च नमियां मुआंदरा हासल करा’रदा ऐ ते रामबन दे सुलाई मखीरै जनेहू उत्पाद गै भारत दी समृद्ध मकामी विरासत ते बड़ी मती आर्थिक समर्थ गी दशानि दा कम्म करा’रदे न। प्रधानमंत्री नरेंद्र मोदी होरें अपने “मन की बात” कार्यक्रम च वोकल फॉर लोकल पहलकदमी दे महत्व पर बी जोर पाया ते आखेआ जे जी-20 शिखर सम्मेलन दरान दुनिया दे लीडरें गी दित्ते गेदे तोहफे बी इस भावना गी दशादि न। उनें इस गल्लै पर खुशी प्रगट कीती जे मुल्लबै च लक्खां बहे लोकें अपने रोजमर्रा दे जीवन च वोकल फॉर लोक दी भावना गी अपनाया ऐ। प्रधानमंत्री होरें आखेआ जे भारत च स्याले आहले सैलसफा लेई हर चाल्ली दी समर्थ ऐ, एहदे च पहाड़ें, संस्कृति ते रोमांच दे अनगिनत मौके बी मौजूद न। उनें दस्सेआ जे उत्तराखंड च स्यालू आला सैलसफा मते सारे सैलानिएं गी आकर्षत करा’रदा ऐ ते स्याले दे मौसम दरान औलल, मनुस्यारी, चोपता ते देयारा जनेहियां थाह्हां लोकप्रिय होआ’रदियां न। प्रधानमंत्री होरें मन की बात नवंबर म्हीने च भारत दी काबले जिक्र खेड्ड उपलब्धिएं दा बी जिक्र कीता। उनें दस्सेआ जे इस म्हीने दी शुरूआत भारती महिला टीम नै आई.सी.सी महिला विश्व कप जित्तने कन्नै कीती ते भारती महिला खडारिएं कबड्डी विश्व कप जित्तियै इतिहास रची दित्ता। इन्ना गै नेई देसै दे खडारियें विश्व मुक्केबाजी कप फाइनल च शानदार प्रदर्शन करदे होई तगमे जित्ते। एहदे अलावा महिला टीम नै बिजन इक मैच हारे ब्लाइंड क्रिकेट विश्व कप जित्ती लैता। प्रधानमंत्री होरें आखेआ जे एह जित्त भारती खेड्डें दे इतिहास च बड्डी जित्त न ते एह हर इक भारती गी प्रेरित करदी रौह्गा। अज्ज आहले

अपने मन की बात कार्यक्रम च मोदी होरें इसरो आसेआ आयोजित अनौखी ड्रोन प्रतियोगिता दा बी जिक्र कीता जेदे च मुल्खै दे नौजोआनें मंगल ग्रह आंडर गै हालात च ड्रोन डुआने दी कोशिश कीती ही। उनें आखेआ जे हर बारी जिसलै ओह नौजवानें दा समर्पण ते वैज्ञानिकें दी प्रतिबद्धता गी दिखदे न तां उंदा दिल उत्साह कन्नै भरोची जंदा ऐ। प्रधानमंत्री होरें आखेआ जे नौजोआनें दा एहू समर्पण विकसित भारत दी सभनें शा बड्डी ताकतें चा इक ऐ।

<><><><><><>

### All Party Meeting

संसद दे कल्लै थमां रम्भ होआ'रदे स्याले आहले इजलास शा पैहले सरकारै अज्ज संसदी भवन च सर्व दलीय बैठक दा सरिस्ता कीता। बैठक दी प्रधानता रक्षा मंत्री राजनाथ सिंह होरें कीती जेदे च राज्यसभा च सदन दे लीडर जे.पी नड्डा, संसदीय कार्यमंत्री किरें रिजिजू ते होर दुए मंत्री मौजूद हे। कांग्रेस, डीएमके, टीएमसी, समाजवादी पार्टी, जनता दल युनाइटेड, टी.डी.पी ते शिवसेना दे लीडर बी बैठक च शामिल होए। एहू इजलास 19 दिसंबर तगर चलोग। बैठक मगरा बोलदे होई मंत्री रिजिजू होरें आखेआ जे बैठक सकारात्मक माहौल च लग्गी ते उनें सभनें दलें गी सुचारू ढंगै सिर कम्म करने ताई सहयोग दी अपील कीती।

<><><><><><>

### RS Oath NC

जम्मू-कश्मीर थमां नमें चनोए दे त्रै सांसद कल पैहली दिसंबर गी राज्यसभा च ओहदे ते राजदारी दी संगंध चुक्कडन। कल गै संसद दा स्याले आहला इजलास बी शुरू होआ करदा ऐ। इनें त्र'ऊं सांसदें च शम्मी आंबराय, सज्जाद अहमद किचलू ते चौधरी मोहम्मद रमजान शामिल न, जिनेंगी उपराष्ट्रपति ते राज्यसभा दे चेयरमैन सी.पी राधाकृष्णन संगंध चुकाडन। राज्यसभा दे इनें चुनाएं च त्रै सीटां

नेशनल कांफ्रेंस नै जित्तियां हियां जिसलै जे बीजेपी गी छड़ी इक्के सीट पर जित्त हासल होई ही।  
बीजेपी दे सांसद सत शर्मा होर पैहले गै एहू सगंध चुक्री चुके दे न।

<><><><><><>

### Pak.Module

दिल्ली पुलस दे विशेष सीगे नै पाकिस्तान समर्थत इक बदमाश कन्नै जुड़े दे आतंकी गिरोट दा भंडाफोड़ कीता ऐ। अज्ज नमीं दिल्ली च इक प्रेस कांफ्रेंस गी संबोधत करदे होई स्पेशल सेल दे पुलस कमिशनर प्रमोद कुमार कुशवाहा होरें दस्सेआ जे इस गरौह दा नेतृत्व इक पाकिस्तानी नागरिक शहजाद भट्टी करा'रदा हा जेड़दा एल्लै आईएसआई दे इशारे पर कम्म करदा ऐ। उनें दस्सेआ जे मामले च पंजाब, मध्य प्रदेश ते उत्तर प्रदेश दे त्रै लोकें गी बी गिरफ्तार कीता गेआ ऐ। उनें दस्सेआ जे इसै म्हीने दी 25 तरीक गी गुरदासपुर सिटी पुलस स्टेशन दे सामने इन्नै गै हथगोला सुट्टेआ हा।

<><><><><><>

### Delhi-Police

दिल्ली पुलसै मशहूर ते लोकप्रिय मार्के दे नां पर नकली सिगरेट दी बंड बिक्री करने आहले इक बड़े गिरोट दा भंडाफोड़ कीता ऐ। उत्तरी दिल्ली पुलस दे डिप्टी कमिशनर राजा बंठिया नै संवाददाताएं गी जानकारी दित्ती ऐ जे छापेमारी च करीब साड्डे त्रै लक्ख सिगरेट जब्त कीते गेन। बजारै च इंदी कीमत कोई 50 लक्ख रपे ऐ। एहदे अलावा दिल्ली पुलस दी अपराध शाखा ने शराब तस्करी दे इक अंतररज्जीय गिरोट दे 2 आरोपिणं गी गिरफ्तार कीता ऐ। इन्दे कब्जे शा 40 पेटियां गैर कनूनी शराब ते एहदी तस्करी च बरती जाने आहली गड्डी बरामद कीती ऐ। पुलसै दस्सेआ ऐ जे दवें आरोपी शराब दिल्ली च खरीदियै बिहार जाइयै बेचदे हे।

<><><><><><>

## Five New languages

मेटा प्लेटफार्म नै क्रियेटर्स लेई 5 नमीं भारती भाशाएं गी जोड़ने दी घोशणा कीती ऐ। मुम्बई च आयोजित 'House of Instagram' कार्यक्रम च दस्सेआ गेआ जे इंस्टाग्राम ते फेसबुक यूजर्स तौले गै अपनी reels दा मराठी, बंगाली, तेलगु, कन्नड़ ते तमिल च अनुवाद करी सकडन। हुनै तगर एह सुविधा छडी अंग्रेजी, हिंदी, स्पेनिशन ते पुर्तगाली च गै उपलब्ध ही। मेटा भारती भाशाएं लेई नमें फांट पेश करियै अपने 'एडिट्स' मोबाइल वीडियो एडिटिंग ऐप गी बी बेहतर बना करदा ऐ। इस ऐप दे एंड्रायड वर्जन च हुन देवनागरी ते बंगाली असामिया लिपिएं च आकर्षक फॉन्ट शामिल होडन, जेह्दे मराठी, असमिया, बंगाली ते हिंदी गी बी सपोर्ट करडन।

<><><><><><>

## Badminton

भारत दी गायत्री गोपीचंद ते त्रिशा जॉली दी जोड़ी नै सैयद मोदी अंतरराष्ट्री बैडमिंटन टूर्नामेंट दे महिला डबल्स दा खताब जिती लैता ऐ। लखनऊ च अज्ज खेड्डे गेदे फाइनल मकाबले च भारती जोड़ी नै जपान दी तनाबे ते आसावा दी जोड़ी गी 17-21, 21-13, 21-15 कन्नै हराइयै खताब अपने नांस करी लैता।

<><><><><><>

## Cricket

भारत ते दक्खन अफ्रीका बश्कार त्रै इक दिनी अंतरराष्ट्री क्रिकेट मैचें दी श्रृंखला दा रांची च खेड्डे जा करदे पैहले मैच च मेजबान टीम नै दक्खन अफ्रीका लेई 350 रनें दा लक्ष्य रक्खेआ। एहदे शा पैहले दक्खन अफ्रीका नै टॉस जित्तियै पहले गेंदबाजी करने दा फैसला लैता। विराट कोहली नै शानदार 135, के.एल राहुल नै 60 ते रोहित शर्मा नै 51 गेंदें च 57 रनें दा जोगदान दित्ता। मेहमान टीम दे

मार्को जेनसन, बर्गर, बोश ते बार्टमैन नै 2-2 विकेटां लैतियां। विराट कोहली नै इक दिनी अंतरराष्ट्री मैचें च अपना 52मां शतक पूरा करियै अपनी शानदार फार्म कन्नै अवगत करोआया।

<><><><><><>

## Ukraine-Russia Drone

यूक्रेनी नौसेना दे ड्रोन नैकाला सागर इलाके च 2 रूसी तेल टैंकरें पर हमला कीता। मीडिया रिपोर्टें मुजब कैरोस ते विराट नां दे एहू दवें टैंकर खाली हे ते रूस दे इक प्रमुख तेल टर्मिनल नोवोरोस्सियस्क आहली बक्खी जा करदे हे। एहू हमले रूसी तेल सप्लाई गी नशाना बनाइयै कीते गे हे जेडे रूस लेई कमाई दा इक प्रमुख जरिया न।

<><><><><><>

## Hongkong Fire

हांगकांग दी 7 उच्चि आवासीय ईमारतें च लग्गी दी अगू च मरने आहलें दी गिनतरी बदिये 146 होई गेई ऐ, जिल्लै के 150 लोकें दा अजें बी पता नेई चली पाया ऐ ते तपाशी अभियान 5में ध्याडे बी जारी ऐ। हांगकांग दे भ्रष्टाचार-रोधी निकाय नै बुधवारें अगग कन्नै सरबंधत ईमारतें दे नवीनीकरण कार्य कन्नै जुडी दी इक महिला समेत 8 लोकें गी कथित तौर पर ज्वलनशील ते घटिया सामग्री दे इस्तेमाल दे आरोप च गिरफ्तार कीता ऐ। वांग फुक कोर्ट अपार्टमेंट परिसर च लग्गी दी भीषण अगग च मारे गेदे लोकें दी याद व हांगकांग त्रै दिवसीय शोक मना'रदा ऐ।

<><><><><><>

## VPN-Poonch-Rajouri

पुंछ दे डिप्टी कमिशनर अशोक कुमार शर्मा होरें जिले च वी.पी.एन सेवाएं गी फौरी तौरा पर मुअत्तल करने दा हुक्म जारी कीता ऐ। सरबंधत अधिकारियें आखेआ ऐ जे सुरक्षा एजेंसिएं इस गल्ला पर चैंता जाहर कीता ऐ जे वीपीएन सेवाएं दा माडा इस्तेमाल इंटरनेट निगरानी थमां बचदे होई गैर

कनूनी गतिविधियें लेई कीता जा करदा ऐ। इस गैऽ दा मकसद निगरानी गी तगड़ा करना ते सार्वजनिक सुरक्षा गी यकीनी बनाना ऐ। उआं जिले च अत्त लाजमी ते सरकारी सेवां जारी रौहने दी मेद ऐ पर अपने निजी कम्में लेई वीपीएन दा इस्तेमाल करा'रदे बसनीकें गी परेशानी झल्लनी पेई सकदी ऐ। सरबंधत अधिकारियें आम लोकें गी गुजारिश कीती ऐ जे ओहू इस फैसले च उं'दा सहयोग करन कीजे कनून बवस्था बरकरार रखने दे मकसद कन्नै गै एहू गैऽ पुट्टी गई ऐ। तोआई, राजौरी जिला प्रशासन नै आम लोकें दी सुरक्षा गी ध्यानै च रखदे होई समूलचे जिले च सब्बे वर्चुअल प्राइवेट नेटवक्र वी.पी.एन सेवाएं गी तुरत प्रभाव कन्नै 2 म्हीने लेई मुअत्तल करने दे हुक्म जारी कीते न। भारती नागरिक सुरक्षा संहिता दी धारा 163 तैहत जिला मैजिस्ट्रेट अभिषेक शर्मा हुं'दे आसेआ जारी एहू निर्देश एस.एस.पी हुं'दी वी.पी.एन दे शुबे आहले इस्तेमाल बारै इक रिपोर्ट मगरा आया ऐ। अधिकारियें दा गलाना ऐ जे वी.पी.एन दा इस्तेमाल पंछान छपाने, बंदशें थमां बचने ते मुमकन तौरा पर गैर कनूनी या देश विरोधी गतिविधियें गी अंजाम देने लेई कीता जा करदा ऐ। इस हुक्म दा मकसद साइबर सिक्योरिटी खतरें गी रोकना ते कनून बवस्था गी बनाए रखना ऐ। पुलिस गी इस आदेश गी सखती कन्नै लागू करने दे निर्देश दित्ते गे न।

<><><><><><>